



過年做粿

細子暢過年，因為過年有紅包好領，猶擱有真多好食个物件。像菜頭粿、紅龜粿、鼠麴粿、甜粿。俾過年个時，屋下愛量早積樵，阿依先枷灶前拚到淨俐淨俐。阿估破樵鋸竹，枷炊粿頭一等好个牛眼樹、麻黃樹園在灶前。竹筴鋸了後，用刀嫵對竹筴頭順勢破開。按竹筴燒到竹目个時，正毋會好天泥磅開得人著掣。阿依嘛攔緊擱禾桿網草網。做細子个偌人即枷草網擱入去灶前，枷佢疊到好勢好勢，枷樵積到硬討堵著屋棟。

過年前兩日，阿依即枷糯米準備好先浸水，阿估枷久無用著个石磨整理好勢，準備好來挨粿。二九遐日，打早即跋起來挨粿，阿估用一支丁字形个鐵枝，頭前鬥在石磨，後背用索吊在屋橫樑，雙手枷鐵枝向前撻擱揪轉來，得石磨轉起來。這時務阿依在石磨唇用搗仔枷糯米加一兜水搗落石磨面上，遐米漿即順著石磨嘴流落板袋。阿估和阿依像變奇術枷糯米一點一滴變做米漿。等挨好啊，即用索枷袋縛得佢纏，園在有墊禾桿个籃內底，面上砑一粒大嫵粒个石頭，枷水分砑莫。另外細子人枷阿依早即炒好个地豆園在大粒春臼舂得佢變做地豆麴好做粿餡。嘛去田擱一兜菜頭、擦菜頭簽，去街路款一兜料轉來做粿餡。

挨好个米漿提來炊菜頭粿和甜粿。這時務个灶頭係頭無閒个。阿依枷擦好个菜頭簽和米漿攪攪仔，擱加一兜五香粉漕落鋪好板巾个籠床，用大支煎匙抹平，籠床蓋揷好，開始起火。枷好樵園入去，過年做粿開始啊。這時阿依點一枝香插在灶頭唇，換偌來顧火，阿依千交代萬交代，樵毋好園傷多，火傷猛，粿即會流去炊毋會靚。炊到香過，阿估和阿依即共下枷籠床扛起來園在隔壁間，續落來甜粿嘛炊好扛起來園个。等三十遐日透早即來開甜粿、開菜頭粿，歸火灶个人圍著遐香噴噴、得人流口涎水个粿，枷佢開做一料一料，提來砑神明桌。

紅龜粿、鼠麴粿係三十遐日晨早愛做个。打早阿依枷袋底砑燥个米漿先提一兜仔起來，園在大鑊底个筴仔面上炊熟，正擱枷炊熟个粿粹摻一層仔紅番米和生个粿粹、鼠麴做一下揸，揸到你泥底有偌，偌泥底有你，分不出你偌个時，即會用提來做粿。阿估揸粿个時，阿依嘛攔緊用大鑊來炒料，有用地豆、紅豆做甜个餡，嘛有摻菜脯米个鹹餡。細子嘛無通閒，愛去井頭洗板葉、月桃葉。物件款好了後，開始做粿。阿估枷揸好个粿捏一坭一坭，阿依枷板搭做一個碗形，枷餡園落搭圓，印板印後園落籠床。等一籠床園湊啊，即起火炊粿。真緊即會鼻著一臨臨錫人个粿味。俾年啊，偌心肝底若像擱鼻著遐熟事个粿味啊。

作者：李秉璋

☆詞彙學習☆

【鼠麴粿】chi^ˊ kiu ban^ˊ：用鼠麴草所做的米食糕點。

【積樵】zid^ˊ cio^ˊ：指在灶前屯積柴火。

【竹目】zhu^ˊ hm^ˊ：指竹子的節。

【好天泥】hoo^ˊ teen^ˊ ni^ˊ：好端端的、突然。

【著掣】choo cheed^ˊ：受到驚嚇。

【草網】coo^ˊ bbin^ˊ：以稻草縈繞、網綁而成的燃料。

【搗仔】kad^ˊ a^ˊ：比較大的勺子。

【開甜粿】koi^ˊ teem^ˊ ban^ˊ：用菜刀將完整的甜年糕切開成塊。

【筴仔】dad^ˊ a^ˊ：一種圓盤狀、有孔隙的竹製炊具。

【粿粹】ban^ˊ ce^ˊ：糯米漿壓乾後的米漿塊。

【紅番米】fung^ˊ fan^ˊ mi^ˊ：六號紅色食用色素。

【板葉】ban^ˊ rhiab^ˊ：黃槿樹的葉子。